



JANE.K. BAINOMUGISHA
OMUKAZI OMUKYIKYI OMWISHENGYERO
AHA'BWA DISTRICT EY'IBANDA
2021 – 2026

“OMUKYARA EMBANDITUKA”

MANIFESTO

Oburugo

Jane K. Bainomugisha n'omurwanirizi w'enshonga z'abakazi n'eminyeeto. N'omufumbo, omuzaire nyin'abaana, kandi n'omwebembezi omu Kereziya. Aine diiguri ya kabiri (Master's) omu ishomo ry'okuta omu nkora n'okureeberera emirimo n'enteekateka za Gavumenti (Public Administration and Management), kandi byona ebi akora abikoresa omujinya n'engoga. Ahanyima y'okukora nka mukuru w'enteekateeka y'okurwaniirira ebyetengo by'eminyeeto (abaishiki n'abatsigazi) aha kitebe ekitegyeki eky'Akakiiko k'Eminyeeto ak'Eihanga ryona (National Youth Council) ak'omu Minisitire y'Emihangirwe y'abantu, eby'Emirimo, n'eby'Entunguuka y'entuura y'abantu, Jane K. Bainomugisha aine ebyafaayo by'emikorere mirungi hamwe n'okukora eby'oburyo, oteebirwe n'okwehayo kuhisya abantu boona ebibarikwetenga obwo aihire aha mutima. Ateire omutindo gw'ebyo ebi arikwenda kukora ah'eidaara ry'ahaiguru munonga kandi naareeba hare kwenda ngu nyensya y'Ibanda, Uganda na Afirika ebe nungi munonga. Hoona kandi nabwo ayehaireyo kuguma arikurwaniirira hamwe n'okukorera obumwe, obujwekyerwa burungi, okureeba ngu abantu batuura kurungi, baagira amagara marungi kandi boona baatunga emigisha y'okutungira emirimo n'obuheereza erikwingana.

Obutumwa bwa Jane

Ahanyima y'abateezi b'akaruuru ab'omu Disiturikiti y'Ibanda kumuhikiirira bakamushaba ku abajwekyera nk'Omukazi Omunyeishengyero aha kakongi k'ekibiina kya Rwangisiriza (NRM), kandi hamwe n'ahanyima y'okwebuuza aha bantu baingi abukirikukwataho, obwo oteebirwe n'okwongyera kwecumintiriza, okucondooza n'okwetegyereza ekyetengo ky'obujwekyerwa burungi ahabw'abantu b'Ibanda, ekyetengo ky'okugaita hamwe abantu baitu kwenda kureetaho entunguuka n'okuhisya abaturage obuheereza, Jane K.Bainomugisha aikiriize kwetsimbaho omu karuuru k'okutoorana Omukazi Omunyeishengyero oraajwekyere Disiturikiti y'Ibanda omu ncuro eraatandike omwaka 2021 ekahwa omugwa 2026.

N'eky'omugisha kandi ekirikuha isa ekitiinisa kubagana naimwe, Abany'Ibanda, ebiteekateeko byangye aha kwerekwa okuhango, ekigyendererwa hamwe n'ebitwine kukora kuhikiiriza ebi disiturikiti yaitu eyorekyereire omu by'entaasya n'emituurire y'abantu obwo turikuhamya eby'entaasya, kureebuka ngu abantu baatunga, disiturikiti yaitu yaaza aha murembe kandi yaaguma erinzirwe kurungi. Twine enteekateeka y'okwombeka Ibanda ehami obwo turikuhamya eby'entaasya turikurabira omu kwombeka amakorero, okushagika eby'obuhingi n'oburiisa ebirugamu sente, eby'obwegyese, okutendeka n'okuha abantu baitu emyoga, okuyonja ekyanga kyaitu n'eb'obuhangwa, obuheereza burungi bw'eby'amagara hamwe n'okuhisya abantu enguuto, eby'empurizana, amashanyarazi n'ebindi ebishagika emirimo y'entunguuka.

Niinyija kwebembeza ekigyendererwa ky'okutaho n'okwongyera eby'entaasya ebirugamu amashaaruura n'amagoba maingi kandi eby'emiringo etari emwe n'emwe kurabira omu kutunguura emirimo y'entaasya ekyendereire kutunguura enkoregana y'ebyanga/ebyaro n'abantu bamwo aha ndengo zoonza ez'eby'obuhingi n'oburiisa, hamwe n'okwongyera amaani omu by'obushuubuzi ebiraahangeho emirimo hamwe n'okwongyera aha mutindo gw'obuheereza ahabw'oburungi bw'Abany'Ibanda.

OKUSHABA KWANGYE

Obwo turikweteguurira oburuuru bw'ekibiina kya Rwangisiriza (NRM) obw'okutoorana oraakwate ebendera y'ekibiina obw'omwaka ogwa 2020 hamwe n'omu buruuru bw'eihanga ryona obwa 2021, ninkushaba ku oyegaita aha **Tiimu Jane**. Nyaburawe ninkushaba akaruuru kaawe. "Obwire buhikire, kora okutoorana okuhikire."

Okworekwa

“Okuhindura Ibanda disiturikiti erikukirayo kugira obumwe, obusingye, empinduka enungi, amakorere hamwe n’obutungi omu Uganda yoona, hamwe n’okuba Disiturikiti ei abantu baayo baine emirimo, ebyokurya birikumara, obuheereza bw’eby’obwegyese n’eby’amagra kandi barikutunga oburingaaniza hamwe n’emigisha erikwingana.”

Ekigyendererwa

Twena hamwe, nitwija kureetaho empinduka kandi twombekye omusigye guhami omu hururu y’okuhindura n’okutunguura Ibanda kuruga aha rurengo rw’okuba ekyanga ky’abahingi n’abariisa abakorera enda kwonka okuba ekyanga ky’abahingi n’abariisa ab’omurembe abakorera entaatsya, hamwe n’okuba ekyanga eky’amakorero, eky’abantu abashomire, abatendekirwe, abaine amagara marungi, kandi oteebirwe n’okuhinduka ekyanga eky’orurengo rw’entaatsya oruringaneire/orwagati kandi oruhikaine n’obugaiga.

Okuhindura entwaza, enteekateeka n'emikorere

Twaba nitwenda kuhikiiriza ekigyendererwa kyaitu, tushemeire kweteguura kuhindura emiteekateekyere yaitu kandi tukagira enteekateeka nungi eijwire amatsiko n'omujinya, tukaikirizana aha ntwaza, ebikuru hamwe n'emicwe ebituraakuratire, hamwe n'okuta omu nkora ebituraikirizaneho – kutari okufa agagamba. Tushemeire kwebembeza n'okuta amaani n'omutima ahari ebi:

1. Okuhurizana okurungi, okuha amatsiko kandi okuteera abantu omwete
2. Okuheerezana ekitiinisa
3. Amazima
4. Okunywana/okukora emikago n'okukwatanisa
5. Okukorera hamwe
6. Okwehara oburi bw'enguzi (obwesigwa n'okuba mwere)

Obwire buhikire, nibw'obu; eshaaha niy'egi

Tihaine ekiturikubaasa kukorera ebyabaireho enyima. Baitu titurikubaasa kwikiriza nyensya kutugwaho bugwaho nk'enjura. Obwire nibw'obu obutushemeire kubagana hamwe ebirooto byaitu n'amatsiko gaitu amaingi kwenda kugira nyensya nungi. Egyo nyensya neija kuba erimu bimwe omuri ebi: obwegyese burungi kandi oburikubaasibwa buri omwe, ebyokurya birikumara, emirimo, obuyonjo bw'ekyanga kyaitu n'eby'obuhangwa hamwe n'okweyongyera kw'entaatsya y'amaka.

Tihariho bwire burungi obundi nka hati. Obu nibwo bwire obutushemeire kuhindura ekyanga kyaitu kwenda ngu kibemu ebyo ebiturikwenda kukireebamu. Tihariho kintu kyona ekirikubaasa kuturemesa kuhindura ekyanga kyaitu tukakita aha mutindo oguturikukyendaho. N'ahabw'ekyo ninshaba ngu tukwatanise, tugambe n'eiraka rimwe, tukore n'ekigyendererwa hamwe n'omutima gumwe kwenda kuhika ahari ebyo ebirikurayo oburungi.

AKARUURU AKU ORAATEERERE JANE N'AKARUURU AK'ENTUNGUUKA, OBUMWE N'OBUIWEKYERWA BURUNGI

1. Entunguuka

1.1 Obwegyese

Niinyija kuta amaani gangye n'omutima gwangye ahari ebi:

- 1) Okushagika n'okureebuza emirimo y'okuta omu nkora ebiraganiso bya NRM eby'obwegyese.
- 2) Okutaho enshaho y'obwegyese eraahwere abeegi abu abazaire/abareeberezi baabo batarikwebaasa
- 3) Okutaho omwanya gw'okuhwera n'okushagika abaine obumuga n'oburema aha mibiri yaabo
- 4) Okutaho omwanya gw'emyoga kwenda kuta omu nkora ehururu y'okuha abakazi n'eminyeeto emyoga
- 5) Okutaho ekiro ky'omutaano eky'okusiima abashomesa/abeegyese b'lbanda ahabw'omurimo muhango ogubarikukorera Disiturikiti y'lbanda.
- 6) Okushakira abeegi b'lbanda obushagiki bw'ebikoresibwa omu by'obuyonjo n'obwecumi omu mashomero n'amatendekyero kuruga omu Gavumenti, ebitongore hamwe n'abanyamikago
- 7) Okwinegyeza enteekateeka z'obwegyese ezirikwongyera amaani omu bwebembezi bw'amashomero n'amatendekyero oteebirwe n'enkoresa nungi ya sente ezi Gavumenti eheereza amashomero, okureeberera kurungi abakozi, okureebuza eby'okwega, emyegyesese n'emishomere omu mashomero ga Puraimare na Siniya, hamwe n'omu bwegyese bw'eby'emikono n'emyoga.
- 8) Okwongyera amaani omu kutendeka abeegyese hamwe n'omunkora y'okwegyese okw'omurembe okwa tekinorogya nk'okwo okukoresa kompyuta.
- 9) Okuheereza abeegi b'lbanda ab'ekibiina kya Mushanju (P7), Siniya ya Kana (S4) na Siniya ya Mukaaga (S6) eby'okushoma kwenda kwegyezamu n'okweijusya ebibaashomire obwo barikweteguura ebigyezo byabo by'ahamuheru.

1.2 Eby'amagara

'Eby'amagara eby'omutindo eby'abantu boona'

Niinyija kuta amaani gangye n'omutima gwangye ahari ebi:

- 1) Okushagika n'okureebuza emirimo y'okuta omu nkora ebiraganiso bya NRM eby'enshonga z'eby'amagara.
- 2) Okwongyera kushaka n'okunywana omu bitongore bya Gavumenti n'ebitongore by'entunguuka ebiheereza obuhwezi n'ekigyendererwa ky'okutungira Disiturikiti y'Ibanda obushagiki bw'eby'amagara
- 3) Okwongyera amaani omu by'amagara eby'aha rurengo rw'ekyanga kandi ebitandikirwaho nk'obuyonjo bw'ahaka; ehururu z'okumanyisa n'okwegyesa abantu ahabikwatiraine n'endwara ezitarikutuuirana, okwerinda akakooko ka Siriimu, okukyebeza hamwe n'okuraguurirwa
- 4) Okushaka n'okushonda sente z'okugura ekyoma ky'okukyebera ekookoro y'omunwa gwa nyinenda, hamwe n'okushaka sente z'ebyoma n'ebindi ebikoresibwa omu murimo ugu
- 5) Okureebuza amarwariro ga Gavumenti kureebuka ngu garimu emibazi erikwetengwa kandi ey'omugasho munonga hamwe n'okufayo kureebuka ngu egyo mibazi yaakoresibwa kurungi
- 6) Okujanzaaza obutumwa n'okuheereza abari omu mushogoyo hamwe n'abakiri kuzaara amakuru agahikire aha by'amagara g'okuteerana okw'omubonano, eby'okuzaara hamwe n'okubariirira oruzaaro
- 7) Emigisha erikwingana n'oburingaaniza omu buheereza bw'okukyeberwa n'okuraguurirwa.

1.3 Eby'obuhingi n'oburiisa

Niinyija kuta amaani gangye n'omutima gwangye ahari ebi:

- 1) Okwongyera amaani omu kureebuuza emirimo y'okuta omu nkora ebiraganiso bya NRM aha nshonga z'eby'obuhingi
- 2) Okutendeka abahingi n'abariisa emiringo misya ey'omurembe nk'okwitiirira ebihingwa, okuhingisa ebyoma, okwejunisa orwezo hamwe n'okutega amaizi
- 3) Okugabira abahingi embibo ezishemeziibwemu kandi ez'omutindo
- 4) Okuta amaani n'okwinegyeza omurimo gw'okwombeka ebitara (amabiikiro g'amashaaruura) hamwe n'ebindi ebikoresibwa omu ndebeerera y'amashaaruura
- 5) Okwinegyeza enkora y'okuhinga n'okuriisa okurugamu sente omuri lbanda kutari kukorera enda kwonka
- 6) Okwinegyeza enkora y'okweteguurira ebigwererezi nk'ekyanda ahabw'abo abahinga/abariisa kutungamu sente
- 7) Okwinegyeza enkora y'okuhinga/kuriisa kutunga amashaaruura g'okuguza omu mahanga agandi n'omu butare obw'aheeru y'eihanga
- 8) Okwinegyeza ekiteekateeko ky'okutandikaho omwanya/paaka y'amakorero g'okwongyera omutindo omu mashaaruura agaruga omu kuhinga n'okuriisa omuri lbanda
- 9) Okwongyera amaani omu nkoresa nungi y'eitaka kurabira omu nkora ya 'eeka emwe' (one-acre model) erugamu amashaaruura maingiho

1.4 Ebindi ebi ndaakore

1.4.1 Eby'emizaano hamwe n'eby'okweshemezamu

Okushagika eby'emizaano omuri lbanda

Okushagika eby'okuzina, okweshongora, n'emizaano erikushesya kandi ekeegyesa omu disiturikiti y'lbanda

1.4.2 Eby'amaizi

Okushakira Abany'lbanda obuheereza bwa naikonda, emidimo n'amaizi aga rwecunda.

1.4.3 Eby'obuhangwa

Okwongyera amaani omu hururu y'okubyara emiti omu Disiturikiti y'lbanda

1.4.4 Amashanyarazi hamwe Nebye'guto

Okushakira egomborora z'Ibanda zoon amashanyarazi kuruga omu kitongore ekigajanzaaza omu byaro ekya Rural Electrification Agency (REA) agency hamwe na Gavumenti okubahisyaho amashanyarazi, nokubakorera eguto.

1.4.5 Eby'amaju

Okushagika emirimo y'okwombekyera efaakazi, efuuzi n'abandi bantu abataine bwekoro amaju agarikuhangaara kandi ag'omurembe

1.4.6 Okuhwera Abakazi

- 1) Okushakira abakazi b'Ibanda n'okubahwera kuganyirwa omu nteekateeka ya Gavumenti ey'okushagika abakazi kwetandikiraho emirimo
- 2) Okushagika okuhandikwa kw'ebibiina by'abakazi ebya biika-oguze (SACCO), hamwe n'okwongyera amaani omuri ebyo ebiriho obwahati kurabira omu kubishakira entandikwa
- 3) Okushagika abakazi kwetandikiraho emirimo erugamu sente nk'okutunganga enkoko, okubaziira, okuteeka emigaati, okuruka n'emirimo y'okuhanga-hanga nk'okweshongora n'ebindi
- 4) Okuhwera abakazi abeetandikiireho emirimo kutunganga obutare bw'ebintu byabo

1.4.7 Okuhwera Eminyeeto

- 1) Okutandikaho enkora y'okuhandiika eminyeeto y'Ibanda etaine mirimo kwenda ngu tubahwere kusherura emirimo, obwo turikubagaita ahari abo abarikwenda abakozi
- 2) Okutandikaho omwanya gw'okwegyesezamu eminyeeto ebya tekinorogya n'empurizana ey'omurembe (Ibanda ICT Centre) kwenda kuhwera eminyeeto kutunganga emyoga n'obukugu omu by'empurizana n'enkoresa ya tekinorogya
- 3) Okuhwera eminyeeto kwetaba hamwe n'okuganyirwa omu nteekateeka za Gavumenti hamwe n'okutunganga aha sente eziheebwa ab'egaiteire omu bibiina
- 4) Okushagika enkora y'okuhwera eminyeeto kutunganga emyoga

2.0 Obumwe

Obumwe nibukora omurimo mukuru munonga omu kureetaho entunguuka

Okusingura endwano n'obutabanguko bw'emiringo yoona kubaasa kuba entambwe mpango omu kureetaho entunguuka omu by'entaatsya n'emituurire y'abantu hamwe n'okubazaahuura kuruga omu bworo n'ebindi ebibatamba eikono. Okwongyera kutereeza

enkora y'ebiragiyo n'amateeka kwenda ngu habeho oburainganiza n'obutagwera rubaju kurabira omu hururu z'okwegyesa abantu, okujumiirira ebikorwa by'endwano n'obutabanguko, hamwe n'okushagika enkora z'okuhezaho endwano n'obutabanguko n'emwe aha mibazi mikuru y'ekizibu eki. Nitwetenga kutoorana kurungi, kukora n'amaani, kuhaana ekitiinisa, okuta ekitiinisa omu nkora y'ebiragiyo n'amateeka, okwehayo kukorera obusinye n'okugarukana, okugumisiririzana, okwikirizana, hamwe n'okwehara ebikorwa by'okurwana n'obutabanguko. Entunguuka neesimba emizi yaayo kuruga omu maka agarimu obusingye, eihoreere n'okubukaara, reero mpaho ebirabyo by'entunguuka bitandika kureebuka kandi birugamu ebijuma. Ku turikwegaita hamwe nitwija kuguma twemereire, baitu twayebaganisamu nitwija kukumbagara. Itwe aba **Tiimu Jane** nitwija kurwaniirira obumwe n'obu haraabe hariho enteekateeka z'obutegyeki n'enyikiriza zitari zimwe na zimwe; nitwija kufayo kureetaho obumwe omu bigambo n'omu bikorwa.

Obumwe omu Madiini

Tiimu Jane neija kushagika enkora z'okureetaho obumwe omu Banyakaturiki, Abakristaayo, Abeishemwe (Abarokore), Abasiraamu, Abacwanga n'abantu b'agandi madiini goona.

Obumwe omu nganda

Hoonabwo **Tiimu Jane** neija kureetaho obumwe omu bantu b'enganda zoonazizi omu Disiturikiti y'Ibanda.

Obumwe omu mashaza g'Ibanda

Tiimu Jane neija kushagika enkora z'okureetaho obumwe omu byanga/amashaza g'omu Disiturikiti y'Ibanda againe Abajwekyerwa omu Ishengyero ry'Eihanga.

3.0 Obujwekyerwa burungi

Okubaga ebiragiyo

Jane naaganisa kubatenseza kurungi omu Ishengyero hamwe n'okwetaba omu mirimo y'okukora ebiragiyo n'amateeka agaraayongyere kushemeza eby'obutegyeki n'obwebembezi, okwongyera kureetaho obusingye, oburingaaniza, okuhezaho okushoorora omu by'okutunga emirimo n'endiijo migisha, okureebuka ngu ebiragiyo tibagwera rubaju (orw'abakazi nainga orw'abashaija), hamwe n'okwongyera kubiba (kuta) sente omu mirimo y'entaatsya kwenda kuhangaho emirimo n'okwongyera abantu na Gavumenti sente.

Okubajwekyera/okubakiikirira

Obujwekyerwa/okukiikirirwa kurungi omu Ishengyero nikwija kuba kuri okwo okw'okwongyera eiraka aha kumanyisa Gavumenti enshonga ezirikuteganisa abantu abu ndikujwekyera hamwe n'abandi bantu b'omu ihanga ryona, hamwe n'okufayo kureeba ngu enshonga ezi hamwe n'ebyetengo by'abantu bangye byakorwaho.

Niinyija kuguma niinyeta enkiiko z'okubeebuuzaho imwe nk'abantu abu ndikujwekyera hamwe n'okubamanyisa entambura y'emirimo y'eishengyero, enkora, enteekateeka n'ebiragiro bya Gavumenti, oteebirwe n'okuguma ninfayo kutunga ebiteekateeko by'abo abu ndikujwekyera, kumanya ebizibu byabo hamwe n'ebyo ebirikuteganisa emirimo yaabo y'entaatsya n'okutwakubaasa kubirondera omubazi.

Hona nabwo niinyija kuguma nimpurizana n'abeebembezi b'ebyanga hamwe n'okwongyera kukoregana kurungi nabo nka gumwe aha miringo y'okumanya enshonga ezirikwetenga kukorwaho ahonaaho hamwe n'okuzitungira omubazi. Eki nikijja kutuhwera kutereza obwebembezi bwa disitirikiti kwenda ngu abantu bamanye ebigyendererwa by'enteekateeka za Gavumenti.

Tihariho kubangaanisa kwona aha nteekateeka erikugira ngu okugumizamu n'ehururu y'okureetaho entunguuka nikutandika n'enkora y'okubaga n'okuta omu nkora ebiragiro n'enteekateeka za Gavumenti omu muringo ogworeka obwebembezi burungi hamwe n'okwebuuzaha bantu boona kwenda ngu hatagira owaarekwa enyima.

Omurimo gw'okureebuza n'okushwijuma emirimo y'okuta omu nkora enteekateeka za Gavumenti

Hona nabwo nk'Omujwekyerwa waanyu omu Ishengyero, nikipuru kufayo kuhikiiriza omurimo gwangye ogw'okureebuza ebiragiro n'emirimo ya Gavumenti kureeba ngu yaateebwa kurungi omu nkora kandi yaagasira boona. Niinyija kuguma ninshwijuma emikorere y'emirimo egi kandi mpeereze obuhabuzi abo abarikuta omu nkora enteekateeka na purogyekiti za Gavument hamwe n'okureeba ngu abantu abashemeire kutunga ebintu n'obuheereza ebiraarugye omu purogyekiti ezi baaba nibo baabitunga, baabitungira omu mwanya oguhikire n'omu bwire obu bashemeire kubitungiramu, oteebirwe n'okureebuka ngu sente za Gavumenti (eziruga omu mishoro n'empa-buhwezi), zaakoresibwa kurungi. Niinyija kurwanisa obushomankuzi/oburi bw'enguzi, enkoresa mbi ya sente, omuze gw'okuzikiikamya bakazikoramu ebintu ebitarikuhwera Abany'Ibanda boona, emize y'okwiba abantu hamwe n'okubashaba ebituga.

Okumanyisa abantu kurabira aha mikutu ya reediyo, enkiiko z'eby'obutegyeki n'enteerane aha bikwatiraine n'obujunaanizibwa n'obugabe bwabo hamwe n'obuheereza n'ebintu ebi

Gavumenti eshemeire kubakorera/kubaheereza. Eki nikijja kwongyera kushemeza enkora z'obwebembezi burungi nk'oburingaaniza, amazima, okutunga embariirira y'enkoresa ya sente n'emikorere y'abeebembezi, obutagwera rubaju omu by'obutegyeki n'okubagana gye sente z'embariirira kwenda ngu ebyanga by'Ibanda byona bihikweho.

Okuhinguzwa embariirira ya Gavumenti/Okubaganisa sente z'embariirira

Niinyija kuba ndi aha tiimu erikwetegyereza n'okushwijuma ebihandiiko ebyoreka oku embariirira ya Gavumenti ehikaana n'ebigyendererwa byayo, ebihandiiko bya Minisitire za Gavumenti ebyoreka emikorere, enteekateeka n'emishohoreze y'ebitongore bya Gavumenti, hamwe n'okwenyigira omu mirimo y'okuhinguzwa embariirira y'eihanga.

Abantu baitu nibeetenga obuheereza burungi obukomooka omu kukora enteekateeka nungi n'okubaganisa sente z'embariirira omu muringo gw'oburyo kandi ogutarikureka muntu weena enyima. Niinyija kufayo kwongyera amaani n'okwebembeza emirimo y'eby'amagara, obwegyese, obuhingi n'oburiisa, oteebirwe n'okushagika enteekateeka ezigyendereire kutunguura abakazi n'abaishiki, obwo ndikwongyera amaani omu bibiina bya sente n'ebigombe bya biika-oguze.

Okunywaniirira Ibanda n'okugishakira

Omunyabwengye omwe akagira ngu emikago y'omuntu nibwo butungi bwe. Nyine obushobozi, okubaasa n'omwete gw'okunywaniirira Ibanda, kandi niinyija kwejunisa okubaasikirwa oku kukorera Ibanda emikago, kuhamya hamwe n'okurekaho egyo ei disiturikiti eine aha rurengo rw'eihanga n'ensi yoona.

Kurabira omu mikago egi, nitwija kwenyigira omu mirimo y'entunguuka, tutunge sente n'obuhwezi bw'endiijo miringo kandi tukwatanise n'abanywani b'Ibanda kureetaho entunguuka n'okushemeza emituurire y'abantu boona.

Enkoregana hamwe n'enkwatanisa nungi n'ebitongore by'omuri Uganda hamwe n'amahanga g'ensi yoona nabyo nibijja kutuhwera kutungira abaana baitu emigisha y'okushashurirwa ebishare by'okwega, okutunga eby'okukoresa omu marwariro n'omu mashomero, hamwe n'okwongyera kushakira abakazi n'abaishiki baitu enteekateeka n'enkora nsya ezigyendereire kuhindura amagara n'emituurire yaabo.

Ekirikukirayo obukuru n'okutaho enkora y'empurizana erikurahuka kandi erikwesigwa ahagati y'Abany'Ibanda na Gavumenti kurabira omu bwebembezi bw'ebyanga. Ekindi ekikuru

n'okureebuka ngu abakazi baaguma bari ebyokureeberaho birungi kuruga aha rurengo rw'amaka gaabo kuhika omu myanya mikuru y'eihanga nk'ey'omu Gavumenti.

Emikago, enkwatanisa n'enkoregana nungi nibiija kutubaasisa kurwanisa n'okumaraho obworo, obutamanya, eibura ry'ebyokurya, eibura ry'emirimo, obutabanguko bw'omu maka, obushomankuzi hamwe n'obundi buremeezi.

Yebare munonga kumpa obushagiki bwawe

Obwire buhikire, kora okutoorana okuhikire

Teerera Jane Bainomugisha,

Ruhanga akumpeere omugisha.